

- 35 'Vuuánana ist iz, fró min, thaz ih es uuirdig bin,  
thaz ih drúhtine sinan sún souge?  
Vuo meg iz io uerdan uuár, tház ih uuerde suángar?  
mih io gómman nihein in min múat ni biréin.  
Háben ih giméinit, in múate bicléibit,  
40 thaz ih éinluzzo mina uuórolt nuzzo.'  
Zi iru spráh tho ubarlút ther selbo drúhtines drút  
árunti gáhaz ioh háрто filu uuáhaz:  
'Ih scál thir sagen, thiarna, rácha filu dóugna:  
sálida ist in éuu mit thineru sélu.  
45 Ságen ih thir éinaz: thaz selba kind thinaz,  
héizzit iz scóno gótes sún frono.  
Ist sédal sinaz in himile gístátaz:  
kúning nist in uuórolti, ni si imo thiononti,  
Noh kéisor untar máne, nj imo géba bringe  
50 fuazfállonti int inan érenti.  
E'r scal sinen drúton thráto gimúnton,  
then alten Sátanasan uuilit er gifáhan:  
Nist in érdriche, thár er imo io instriche,  
noh uuínkil undar himile, thár er sih ginérie.  
55 Flúhit er in then sé, thar gidúat er imo uué,  
gidúat er imo frémidi thaz hoha himilrichi.  
Thoh hábet er mo írdéilit ioh selbo giméinit,  
tház er nan in béche mit kétinu zibréche.  
Ist éin thin gisibba reues úmberenta,  
60 iú mánageru zíti ist daga léitenti:  
Nust siu gibúrdinot kíndes so díures,  
so fúrira bi uuórolti nist quéna berenti.  
Nist uuíht, suntar uuérde, in thiu iz gót uuolle,  
nóh thaz uuidarstánte drúhtines uuórte.'  
65 'Ih bin', quad si, 'gótes thiu zerbe gibóranu:  
si uuort sínaz in mir uuáhsentaz!' —  
Uuolaga ótmuati! so guát bistu io in nóti,  
thu uuári in ira uuórte zi follemo ántuurte.  
Drúhtin kos sia guáter zi éigeneru múater:  
70 si quad, si uuári sin thiu zi thionoste gáruuu. —  
E'ngil floug zi himile zi selb drúhtine;  
ságata er in fróno thaz árunti scóno.

## 9. VI. Exurgens autem Maria abiit in montana.

- Fúar tho sca Mária, thiarna thiu mára,  
mit ílu ioh mit mínnu zi ther iru máginnu.  
So si in ira hús giang, thiu uuirtun sja érlícho intfiang,  
ioh spílotá in theru múater ther ira sún guáter.  
5 Spráh thiu sin múater: 'héil, uuíh dóhter,  
uuóla uuard dih lébenti ioh gilóubenti!

8, 61 Vor kíndes ist thes (fehlt PF) übergeschrieben, aber sehr verblichen V.  
9, 2. zi thér iru P, zeriru (the nach e übergeschrieben) V.